

**Ineqarnermut akiliutit qaffakkiartuinnartut, kiisalu boligsikring tapiissutit qaffanneqarnissaat, aammalu kiassanermut akiliutit qaffasippallaarnerat pilugit apeqquteqaat aallaavigalugu oqallinnissamik siunnersuut**  
(Inatsisartuni ilaasortaq Hans Enoksen, Partii Naleraq)

### **Akissuteqaat**

(Ineqarnermut, Sanaartornermut Attaveqaqatigiinnermullu Naalackersuisoq)

Inatsisartuni ilaasortaq Hans Enoksen, Partii Naleraq, qulequtaq annertoorejussuaq, Naalackersuisoqarfinnut assigiinngitsunut arlalinnut tunngasoq, aammalu naatsumik akiuminaattussaq pillugu apeqquteqaat aallaavigalugu oqallinnissamik siunnersuuteqarpoq. Taamaattumik isummersuutinut tamanut pingaarnernullu tunngasorujussuarmik saqummiussinissara siunniuppara.

Kalaallit Nunaanni Naatsorsueqqissaartarfik malillugu 2006-imiit 2014-imut isertitat akileraarutaasussat 22%-inik amerleriarsimapput. Atuisunut naleqqersuutit piffissami tassani 25,6%-inik qaffariarsimasut aamma takuneqarsinnaavoq.

Aamma 2006-imiit 2014-imut kisitsisit uku A/S Inissiaatileqatigiiffik INI-mit paasissutissiissutigineqarput:

Ineqarnermut akiliutit 29,2%-inik qaffariarsimapput  
Kiassanermut aningaasartuutit 73,7%-inik qaffariarsimapput  
Imermut aningaasartuutit 21,2%-inik qaffariarsimapput  
Ineqarnermut aningaasartuutit tamarmiusut (ineqarnermut akiliutit, kiassarneq imerlu) 37,5%-inik qaffariarsimapput

Tassa ilumoorpoq, 2006-imiit 2014-imut isertitat atuisunut akitulli imaluunniit ineqarnermut akiliutitullu qaffatsigisimangimmata. Kisiannili tassani ineqarnermut tapiissutit attartortunut akissarsiakinnerusunut akit ineriartornerinik kigaallatsitsisarmata eqqumaffigineqassaaq.

Piffissami tassani kiassanermut aningaasartuutit inoqutigiit inissiamut aningaasartuutaanit tamarmiusunit annertusingaatsiarsimapput, 2006-imi kiassanermut aningaasartuutit 20%-iusimagamik, kisiannili 2014-imi 24,6%-iusimallutik.

Inatsisartuni ilaasortaq Hans Enoksen oqarpoq, inissiat inoqanngitsut, najugaqarfinni aningaasartuutininik qaffatsitsisartut amerlasut. Inissiarsuaq inuerutitinneqaraangat, kiassarnerup, erngup innaallagissallu tamarmik qaminneqartarneri soorunami pingaarnertut tunngavigineqartarpoq.

Naalackersuisut ukiuni makkunani Namminersorlutik Oqartussat suliassaqarfiinut tamanut pilersaarusiortutik sulileruttorput. Ineqarnermut tunngatillugu Naalackersuisut ukioq maannangaaq illoqarfiit pilersaarusiortifigineqareersut aallartissavaat. Tamatuma kingunerisaanik inissiattoqqat akisuallaat, aammalu ineqarnermut akiliutinik qaffatsitsissutaasartut isaterneqassapput. Tamatumattaarlu aamma kingunerisaanik sumiiffiit ilaanni nutaanik inissialiortiternermut pilersaarusiortoqartariaqarpoq.

Tassalu immikkoortunut pilersaarusiortarnerup kingunerisaanik inissianik attartortittakkanik ingerlatsinerup pitsanngorsarneqarnissaa, aammalu attartortut inissianut ingerlatsinikkut

pitsaanerusunut katersorneqarnissaat aallunneqassaaq. Taamaalilluni ineqarnermut akiliutit qaffannginnissaat, akerlianilli immikkoortunut pilersaarutini inassuteqaatit piviusunngortinneqartarnerat malillugu apparnissaat neriuutigineqarpoq.

Ineqarnermut akiliutit qaffakkiartorunnaarpata, pisullu ilaanni apparpata, attartortut pisortat inissiaataannut akiitsuusa apparnissaat neriuutigineqarsinnaavoq. Taamaalillunilu pisut ingerlaavartut, najugaqarfiit aningaasaqarnerinut pitsaasumik sunniuteqartussat aallartinneqassapput.

Nukissiorfiit ungasianiit kiassarnermut akit pillugit ilisimatitsipput, 2006-imiit 2014-imut akit 0,52 kr./kWh-imiit 0,81kr. /kWh-imut qaffassimasut. Tassa oqaatigalugu akigititaasoq 55,8 %-nik qaffassimavoq. Piffissami tassani uuliap akia 3,64 koruunimiit 6,32 koruuninut, tassalu 74 %-inik qaffassimavoq. Uuliap akitsungaatsiarneranut 2014-imi uuliamut akit qaffaataasa aatsaat 2015-imut akigititaasunut ilanngunneqarnera pequtaavoq.

2004-mi Naalackersuisuusut, ilisimaneqartutut nukissiuuteqarnermi akiusut assigiimmik akeqartitsinermiit assigiimmik akeqartitsiunnaarnermik taasamut allanngortinniarlugit suliniuteqarput. Assigiimmik akeqartitsinerup nalaani innaallagissamut, imermut kiassarnermullu akiusut nuna tamakkerlugu assigiipput, assigiimmillu akeqartitsiunnaarnerup atuutsinneqalerneratigut innaallagissamut imermullu akiusunut najukkani ataasiakkaanut aningaasartuutit aallaavigineqartussanngorput. Tamatuma kingunerisaanik illoqarfinni mikisuni nunaqarfinilu amerlasuuni innaallagissamut imermullu akit qaffapput, taakkunani nalinginnaasumik akit annerpaaffissaannut akiliisoqartarmat.

Aaqqissuusseqqinnermi aalajangiunneqarpoq, kiassarnermut akiusut nuna tamakkerlugu assigiissasut, aammalu kiassarnermut akiusunut uuliamut akit tunngavigineqassasut. Ungasianiit kiassarnermut aningaasartuutit innuttaasut, namminneerlutik uuliatortunik kiassaattillit kiassarnermut aningaasartuutaannut assingunissaat tunngavigineqarpoq. Taamaalilluni kiassarnermut akit qaffasingaatsiartarput, kisiannili atuisut tamarmik kiassarnermut assigiimmik akiliisarput. Kiassarnerup ilaa erngup nukinga aqqutigalugu, aammalu innaallagissiornermit kissap sinnera atorlugu tunisassiarineqarmat, kiassarnermit isertitat aalisakkerivinnut innaallagissamut imermullu akikillisaatinut, kiisalu innaallagissamut imermullu akit qaffasinnerpaaffissaannik killiliinermut matussuseqataasarput. Naalackersuisut innaallagissamut, imermut kiassarnermullu akit qanoq iliorluni aalajangersarneqartarnissaannut siunnersuusiorput, taamaalilluni akit annertunerusumik nammaqatigiinnermik naapertuinnermillu tunngaveqalissallutik. Siunnersuutit 2017-imi saqqummiunneqarnissaa naatsorsuutigineqarpoq.

Attartortut kissamik atuinernik toqqaannartumik takusinnaagaangamikku, atuinertillu malillugu akiliisaraangamik, atuneq annikillisarpoq. Taamaattumik aamma kiassarnermut immikkut akiliisitsisalernissamik sulissuteqartoqassasoq Naalackersuisut isumaqarput.

Pineqartoq pillugu Demokraatit aalajangiiffigisassatut siunnersuutaata (UPA 2016 imm. 53) suliarineqarneranut atatillugu, ullumikkut ataatsimoorluni akiliiffiusartuni immikkut kiassarnermut uuttuusersuinissaq pillugu nassuiaasiortoqassasoq aalajangiunneqarpoq. Nassuiaammi ilaatigut teknikkikkut aaqqiinissamut periarfissat suut, inissiaqarfinni assigiinngitsuni innersuunneqarsinnaanersut, kiisalu aaqqissuussinissaq suliassamullu aningaasalersuinissaq nassuiaatigineqassapput. Sanaartornermut Ataatsimiititaliamit siunnersuutigineqartutut, nassuiaat aamma nunatsinni uunnaaveqarfiit kiassaateqarfiillu tamarmik qaqugu Nukissiorfinnut tunniunneqarnissaannut piffissamut pilersaarummik imaqassaaq.

Isumaginninnermi tapiissutaasartut eqqarsaatigalugit suliaqarfiit arlallit ataatsimut ajornartorsiortitsisarnerat, kiisalu maanna ineqarnermut tapeeriaatsit naleqqutinngitsumik iluseqarnerat ilisimaneqarpoq. Taamaattumik 2017-2018-imi misissueqqissaarnermik annertunerusumik, ajornartorsiutinut taakkununga aaqiissutissanut najoqqutassanik assigiinngitsunik ineqartussamik aallartitsisoqassaaq. Tassalu pisortanit ikiorsiissuteqartarnej pillugu isumasioqatigiinnermik, ajornartorsiutinit taakkunanga arlalissuit pillugit oqalliffiusussamik ukiamut ingerlatsisoqarnissaa Ilaqutariinnermut, Naligiissitaanermut Isumaginninnermullu Naalackersuisoqarfiup pilersaarutigilereepaa. Aaqiissutissanik ataavartunik atasinnaasunillu nassaarniarluni sulineq ajornakusoorpoq, taamaattumillu najoqqutassanik nutaanik nassaarniarnej suliarilluagaasariaqarpoq.

Taamatut oqaaseqarlunga oqallinnissaq Inatsisartunut tunniuppara.